

La carta de San Pablo a los Efesios

Efeso cuto gånare Pablo ï papera cõare gaye

1 ¹Ñati Efeso gånare mña. Yñ ña Pablo adi papera mñare cõagũ. Jesucristore queno tñorũnucõri ïre jidicārã meje ña mña. Jesucristo oca yñ goti ucure ãmoñi Dios. Ito bajiri masare yñ riaso ucutoni yure cũni ï. ²Mñare yïari mani Jacu Diore, ito yicõri Jesucristore cuni senia yñ. Mñare ti maicõri queno yïjaro Dios. Ito yicõri mña ya ãsijũ queno sajari oca cuti quenaro ñajaro, yirocu Diore senia yñ mñare yïari.

Cristona sñoriti quenarise manire cõañi Dios, yire gaye

³“Rẽtoro queno yigũ ña Dios mñ”, mani Ujũ Jesucristo Jacure yi rucubñorũja manire. Cristo ñarã mani ñajare, quenoguti yĩni Dios manire. Ito bajiro yicõri jeyaro ïmacũju gaye mani tuoia wanũroca yami Dios, mani ya ãsijũ queno mani ñatoni. ⁴Adi macārucũro ï rujeoroto riojũa manire beseñi Dios, ï ñarã mani ñatoni. “Cristore tñorũnũrã yirãji ña”, yi tuoia masicõri, manire beseñi Dios. Ito bajiri manire ti maicõri, “Ñe seti ma ñare. Yñ ãmoro bajiro queno yirã ñama ña”, yi tiguũji Dios manire. ⁵Jane mejeju manire ti maicõri, manire beseñi Dios. “Yñ ñarã ña ñatoni, yñ Macu Jesucristore cõagũ yigũja yñ”, yi tñoiayijũ Dios. Ito bajiro yi tuoĩacõri ï rĩa mani ñaroca yĩni Dios manire. ⁶Ito bajiro manire ï queno yijare, ado bajiro ïre yi rucubñorũja manire: “Guare quenoguti ya Dios mñ. Mñ Macu Jesure bũto maibojaguti gua ñeñaro yirise waja, ï waja yi ïsitoni ïre cõayija mñ. Ito bajiro yicõri guare masoyija mñ. Rẽtoro queno yigũ ña mñ”, Diore yi rucubñorũja manire. ⁷Manire ti maicõri ado bajiro quenoni Dios. “Mñ ya rĩnati masa ñeñaro yirise waja, waja yi ïsigũ yigũja mñ”, yigũ ï Macure cõayijũ Dios. Ito bajiri Cristore mani tñorũnũja ticõri, mani ñeñaro yirisere ãcabojoñi Dios. Ito yicõri manire masoñi ï. ⁸Manire ti maicõri bũto queno yĩni Dios manire. ï gaye queno mani tño masiroca yĩni. Ito bajiri ï ejabuarisena ï ocare queno tño masirã yirãji mani. ⁹Jane mejeju, “Ado bajiro yigũ yigũji Dios”, yi masibisjarã masa maji. Adi rãmũriama Jesucristo ñarã mani ñajare, “Ado bajiro queno yigũ yigũji

Dios”, mani yi tuo masiroca yigu yiguji Dios. Ado bajiro yigu yiguji i. ¹⁰Dios i amori ramu, manire miojugu yiguji i. No mani naroti, manire amigu yiguji Dios. Ito yicori umacuju gana, jaca gana jeyaro adi sita gaye cuni Jesus sigiti i rotiroca yigu yiguji Dios. Ito bajiro yigu yiguji Dios, Jesus sigiti Uju i natinatoni.

¹¹Dios i tuoaro bajiroti jeyaro retaro yiroja. Cristo narã mani natoni, jane mejeju i amoro bajiroti manire beseñi Dios. “Ado bajiro yigu yiguja yu”, yi tuoacori, ito bajiro yiyiju Dios. Ito bajiri Cristo narã mani ñaja ticori, wanugũ yiguji Dios ija. ¹²Gua judio masama, mua riojuaju Cristore tuorunusocu gua. Guare besecori, Jesucristore gua rucuboroca yini Dios. “Retoro queno yigu ñami Dios. Ire mani tuorunuja manire masogu yiguji i”, gua yi rucubotoni guare cuni Dios. ¹³Jesucristore tuorunura ña mua cuni. I oca quenarise tuocori, “Cristore mani tuorunuja, manire masogu yiguji Dios”, yi tuorunuyija mua cuni. Ito bajiri Dios i goticado bajiroti, Espiritu Santo queo sayiju Dios mua ya usiju. Ito bajiro i yijare, “Dios narã ña mani”, yi tuoia masia mua cuni ija. ¹⁴Mani ya usiju i ñaja, ado bajiro ya mani: “Yu ñenaro yirise waja, waja yi isicani Dios. Ito bajiri i raca catitnagũ yiguja yu. Ito yicori jeyaro umacuju i goticado bajiroti bujagu yiguja yu”, yi tuoia mani. Ito bajiri, “Retoro queno yini Dios”, yi rucuboariti naruja manire.

Diore tuorunurãre i masirise isijaro yiroca, Pablo Diore i seni isire gaye

¹⁵“Mani Uju Jesure tuoruncori gajerã Jesure tuorunurãre tuo mairã ñama Efeso gana”, muare masa ina yija tuocu yu. Ito bajiro ina yija tuocori, wana yu. ¹⁶Muare wanucori, “Queno ya Dios mu”, yisotia yu Diore. Ito bajiri muare tuoacori muare yari Diore seni jidicabea yu. ¹⁷Retoro ñasagu ñami mani Jacu Dios. Iti ñami mani Uju Jesucristo Jacu. Ire senisotia yu, muare yari. I gaye queno mua tuo masitoni, muare yari Diore busi isisotia yu. Ito yicori ire mua queno masitoni ire senisotia yu. ¹⁸Manire besecori mani ñenaro yirisere coe jeoni Dios. Ito yicori i narã mani natoni, manire cuni Dios. I narã nacori, umacuju catitnare gaye boca amirã yirãji mani. Iti ña oca retoro quenarise. Itire queno mua tuo masitoni, Diore busisotia yu. ¹⁹⁻²⁰Ado bajiro manire i masirise ioñi Dios. I masirise iogũ, Jesus i godaja bero mucana tãdi i catiroca yini Dios. Ito bajiro yicori i ya riojadaja, rucuboraju, Jesus i rujiroca yiyiju Dios. Retoro masigũ ñami i. Ito bajiri queno manire ejabaguji, ire mani tuorunuja. Itire mua tuo masitoni muare yari Diore busisotia yu. ²¹Ito bajiro rucuboraju Cristore ruji rotiyiju Dios adi macarucuro rotiri masu i natinatoni. Ito bajiri Uju ñasagu ñami i. Gajerã rotiri masa retoro roti masigũ ñami Jesus. Nimu gãji i robo roti masigũ maquji. I ñami ñari masa retoro mani rucuboroca. Ito bajiro cuyiju Dios Jesucristore Uju ñasagu i natinatoni. Ito bajiri adi macarucuro iti jedija bero Uju ñasagu natinacogũ yiguji i. Ito bajiroti natinacogũ yiguji Cristo. ²²Adi macarucuro jeyaro i rotiroca cuyiju Dios Jesucristore. Ito bajiri Cristore mani tuorunuja, iti ñami mani Uju. Manire umatã nagũ ñari

mani rijoga ñami í. ²³Cristore tuorũnucõri sîgũ bajiro riti usi cuti ñarã ña mani íja. Mani ya usijũ ñaguíji Cristo. Ito bajiri í ya rujũ robo bajirã ña mani cuni íja. No mani ñarijuti mani rãca ñagũ yiguíji Cristo. Cristo í manija ñe gaje manoja. Ito bajiri mani rãca í ñajare ñe ruyabea manire.

Manire ti maicõri manire Dios í masore gaye

2 ¹Iti rumũju Diore tuorũnabiticõri, ñeñaro yirã ñacu mani maji. Ito bajirã ñari jeame ñjuroju warona ñabojacu mani. Ito bajiri godacãna robo bajirã ñacu mani maji, Diore masibiticõri. ²Iti rumũ adi macãrucũro gãna ñeñaro yirã bajiro yibojacu mani cuni maji. Ito yicõri rũmũa ñjũre cũdibojacu mani maji. Íti ñami Diore cũdimena ñju, Satanás wame cutigũ. Í ñami ñeñaro ñna yiroca yigũ. ³Iti rumũ Diore cũdibitiana ñeñaro ñna yiado bajiro yibojacu mani cuni maji. Mani tuoĩaro bajiroti ñeñaro yicũ mani maji, Diore masibiticõri. Manimasiti mani ya rujũ ñeñaro iti tuoĩaro bajiro ñeñaro yibojacu mani maji. Diore cũdirã meje ñacu mani. Mani ñeñaro yirise waja Diore waja ruyuriocu mani maji. Ito bajiri jeame ñjuroju warona ñabojacu mani maji. ⁴Ito bajibojarocati manire bũto ti maicõri, manire ãmosacõyijũ Dios. Ito bajiri manire yiari queno yiĩni í. ⁵Ñeñaro yirã mani ñaja, Dios í tija, godacãna bajiro bajirã ñacu mani. Ito bajibojarocati Jesucristore mani tuorũnũja ticõri, Cristore mucana tũdi í catiroca Dios í yiado bajiroti, tũdi mani catiroca yiyijũ Dios. Mani queno yirise ticõri meje manire masoĩni Dios. Manire ti maicõri, “Yũ Macũre tuorũnurã ñama ñna”, yicõri manire masoĩni Dios. ⁶Cristo í godaja bero mucana tũdi í catiroca yiyijũ Dios. Ito yicõri ñmacũju ñre ãmi mũja wacõri í tũju rũcũbuorajũ Cristore ruji rotiyijũ Dios. Ito bajiri Cristo ñarã ñacõri rũmũa ñjũre cũdirã meje ña mani íja. ñmacũju Cristo rãca rujirã bajiro tiguíji Dios manire. ⁷Ito bajiro yiyijũ Dios, queno í yirise manire ñorocu. “Jesucristo ñarã mani ñajare, manire ti maicõri quenoguti yiĩni Dios”, mani yi tuoĩatĩñatoni, manire í queno yirise ñoĩni Dios. ⁸Manire ti maicõri quenoguti yiĩni Dios. Í Macũ Jesucristore mani tuorũnũja ticõri, manire masoĩni Dios. Mani queno yigorise waja yirocu meje manire masoĩni í. Manire ti maicõri rocati waja senibicũti manire masoĩni Dios. ⁹Mani queno yigorise ticõri meje manire masoĩni Dios. Ito bajiri, “Yũ queno yigorise ticõri, yũre masoĩni Dios”, yi masibe a mani íja. ¹⁰Dios í rujeoana ña mani. Jane mejeju í tuoĩa yucãdo bajiroti meniĩni Dios manire. Í Macũ Jesucristo ñarã mani ñatoni manire rujeoĩni Dios. “Yũ Macũre ñna tuorũnũja, í ejabũarisena quenarise riti yirãji ñna”, yi tuoĩacõri, manire rujeoĩni Dios.

Dios rãca mani oca cutirise quenõni Cristo, yire gaye

¹¹Iti rumũ Diore masirã meje ñayija mũa maji. Ito bajiri mũare ti tudicu gũa masa. “Judio masa meje ñama ñna. Ito bajiri Diore cũdibiticõri, gũa yisotiado bajiro wiro tabeama ñna”, yicũ gũa masa mũare. “Diore cũdirã ñari

wiro tagoana ña guama”, yi ti tudicu gwa muare. “Ito bajiro yi tuoñayijarã judio masa guare”, yi ãcabojabesa mua. ¹²Iti rumuju Jesucristore masirã meje ñayija mua maji. Dios ñarã meje ñari ï rãca sigũre bajiro tuoñabisija mua maji. Ito bajiri, “Ï ñami mani wajacu”, yiado bajiro tuoñayija mua maji, ïre masibiticõri. “Dios ñarã mani ñajare ï yiado bajiroti manire masogũ yiguñji ï”, yi tuoña yurã meje ñayija mua maji. “Ito bajiro yigu yiguñji Dios”, yi tuoñabisija mua. Adi macãrucũro gaye ñeñaro yire tuoña wanucõri, Diore masirã meje ñayija mua maji. “Ito bajirã ñabojacu gwa maji”, yi tuoñaña mua. ¹³Adi rumuriama Jesucristore tuorũnurã ñari Dios ñarã ña mua ïja. Manire goda ïsicõri, Dios ñarã mani ñaroca yiyiju Cristo. Ito bajiri ï rãca sigũ bajiro riti tuoñarã ña mani ïja. ¹⁴Cristo ñami oca quenori masu. Iti rumuju sigũre bajiro meje tuoñacu mani maji. Iti rumuju gwa judio masa rãca oca ñacu maji. Ito bajibojarocati mani jeyarore goda ïsicõri oca quenõni Cristo. Ito bajiri sigũ bajiro riti tuoñarã ña mani ïja. Cristo oca ï quenõja bero wajana robo bajirã meje ña mani ïja. ¹⁵Manire Cristo goda ïsijare, “No Moisés ñayoru rotirisere cudi jeobicuti jeame ãjuroju wacu yiguñji”, yire ma ïja. Manire goda ïsicõri mani gãmeri ti tudirise jediroca yiñi Cristo. Jua butu mani ñabojarocati, co masa bajiroti mani ñaroca yiñi Cristo. Ito bajiri gãmeri mani ti tudirise ma ïja. Oca quenõni Cristo ïja. ¹⁶Yucutõju manire goda ïsicõri, Dios rãca mani queno ñaroca yiyiju Cristo. Ito bajiri, “Ñe seti ma ñare. Yure waja ruyuriobeama ña ïja”, yi tiguñji Dios manire. Manire goda ïsicõri, mani gãmeri ti tudirise jediroca yiñi Cristo. Ito bajiri jua butu gãna mani ñabojarocati, Cristore tuorũnucõri, co masa bajiroti ña mani ïja.

¹⁷Oca quenarise gotirocu adi macãrucũroju wadiyiju Cristo. Dios ñarã meje mua ñabojarocati Dios rãca mua oca cutirise quenorocu adi sitaju wadiyiju Cristo. Gwa judio masa, Dios ñarã ñabojarãti ï rãca oca cuticu gwa cuni. Ito bajiri Dios rãca gwa oca cutirise quenorocu adi sitaju wadiyiju Cristo. ¹⁸Mani ñajedirore goda ïsiyiju Cristo. Ito bajiri judio masa mani ñaja, mani ñabeja cuni, Espiritu Santo ï ejabuarisena Diore busi masia mani ïja. ¹⁹Ito bajiri judio masa meje mua ñabojarocati, “Yu ñarã ñama ña”, yigu yiguñji Dios muare. “Yu Macu Jesucristore tuorũnucõri yu ñarã ñama ña ïja”, yi tiguñji Dios muare. Ito bajiri Cristore tuorũnucõri co masa ña mani ïja. Dios ñarã riti ñacõri cojuti ñatiñaronã warã ya mani. ²⁰Gũta wi masa ña meni ãmoja, sita butirise ãmarã yirãji ña, wi iti jujabe yirona. Sita quenarise bujacõri, gãta ajeri quenarise ãmarã yirãji ña, yoari iti wi ñatoni. Jesucristo ï cũana ito yicõri Diore goti ïsiri masa, sita queno buti quenarise robo bajirã ñama ña. Ña riasorisere tuocõri, Cristore tuorũnu jidicãmenaji mani ïja. Gũta wi meniroti bajiro bajirã ña mani. Ito yicõri gãtagã ñasarica ña cõaraga robo bajigu ñami Jesucristo. Ï ñami manire ãmatã ñagũ. ïre mani tuorũnuja, catitiñarã yirãji mani. ²¹Cristore tuorũnucõri, sigũ robo bajiro riti tuoñarã yirãji mani. Ito bajiri Dios ñarã ñari queno ïre moa ïsirã yirãji mani. Ito bajiro mani yija ticõri, gãjerã cuni Diore rucubworã yirãji. Jesure tuorũnucõri, ï rãca Diore wi meni ïsirona bajiro bajirã yirãji mani. Mani ya usiju Dios ï ñaja, ï ya wi robo bajiro

yiroja mani ya rujū. Ito bajiri Jesure riti mani t̄uor̄ūn̄uja, quenari wi Diore meni īsiado bajiro bajirā n̄arā yirāji mani. ²²Gua masa meje n̄abobarāti Jesucristore t̄uor̄ūn̄uc̄ōri Dios n̄arā n̄a mua c̄uni īja. Ito bajiri cocati īre moa īsic̄ōri, ī n̄arā riti n̄a mani. Ī ya Ūsi manire ī queo s̄ajare, ī ya wi robo bajirā n̄a mani īja.

Judio masa mejere c̄uni Dios oca Pablo ī gotire gaye

3 ¹Ū n̄a Pablo, Jesucristore moa īsiri masu. Mua judio masa meje n̄arāre Jesucristo oca yū riasoja tic̄ōri, ado tubiara wijū yūre c̄ūama īna. Adocāta Dios n̄arā mua n̄ajare m̄uare yiari Diore seni īsisotia yū. ²“Judio masa meje mua n̄abobarocati, m̄uare ti maic̄ōri, m̄uare queno yiñi Dios”, yi riasoa yū m̄uare. Yūre queno yijaro yiroc̄u, ito bajiro m̄uare riasoroc̄u yūre c̄ūni Dios. “Itire masirāji īna”, yi t̄uoīa yū m̄uare. ³“Judio masa meje n̄arāre c̄uni ti maic̄ōri, īnare masogū yiguīji Dios”, yi yū t̄uoīa masiroca yiñi Dios yūre. Iti r̄um̄ujū iti ocare masibisjarā masa. Ito bajiri iti paperana jabeto m̄uare gotis̄uoa yū itire ⁴Ū ucare tic̄ōri, “Ḡuare c̄uni goda īsiñi Cristo. Iti oca ḡajerā īna masibitire, queno masiami Pablo”, yirāji mua yū ucare tic̄ōri. ⁵Buc̄rā n̄ayoana iti ocare masibisjarā īna. Adi r̄um̄uriama gua Jesús ī c̄ūana, Diore goti īsiri masare c̄uni, ī ya Ūsi īnare queo s̄ac̄ōri iti ocare īna masiroca yiyijū Dios. ⁶Ado bajiro bajaia iti oca: Judio masa, judio masa mejere c̄uni, Cristo oca quenarisere mani t̄uor̄ūn̄uja, manire masogū yiguīji Dios. Ito bajiri ī n̄arā n̄ac̄ōri, co masa bajiroti n̄arā yirāji mani. Ito bajiro Cristore t̄uor̄ūn̄uc̄ōri Dios ī gotic̄ado bajiroti ī īsirotire boca āmirā yirāji mani.

⁷Yūre ti maic̄ōri, iti oca quenarise masare yū goti uc̄utoni yūre c̄ūni Dios. Ito yic̄ōri ī oca queno yū goti masitoni yūre ejab̄uami Dios ī masirisena. ⁸“Queno yigu meje yū n̄abobarocati yūre beseñi Dios”, yi t̄uoīa yū. Ḡajerā Cristore masirā berojua gagū n̄a yū. Yū tija n̄asagu meje n̄a yū. Ito bajibobarocati yūre ti maic̄ōri, yūre beseñi Dios. Yūre besec̄ōri, judio masa meje n̄arāre c̄uni Cristo oca yū gotitoni yūre c̄ūni Dios. “Cristore mua t̄uor̄ūn̄uja, r̄etoro queno yigu yiguīji Dios m̄uare”, yū yi goti uc̄utoni yūre c̄ūni Dios. ⁹“Judio masa meje n̄arāre c̄uni masogū yiguīji Dios”, yū gotire āmoguīji Dios, n̄ajediro masa īna masitoni. Adi mac̄ar̄uc̄ōro ī rujeoroto riojua, “Ū Mac̄ure īna t̄uor̄ūn̄uja, judio masa meje n̄arāre c̄uni masogū yiguja yū”, yi t̄uoīayijū Dios. Ito bajibobarocati iti oca masa īna masiroca yibisijū Dios maji. ¹⁰Judio masa meje n̄arāre c̄uni masoc̄ōri, ī masirise īoyijū Dios. Ito bajiri adi r̄um̄uri īja āngel mesa, ūmac̄ūjū rotiri masa c̄uni ado bajiro yirā yirāji īna: “Jeyaro masigū n̄ami Dios. Quenarise riti t̄uoīagū n̄ami ī. Judio masa, judio masa mejere c̄uni ī masoja bero, sigū bajiro riti t̄uoīarā n̄ama īna īja”, yirā yirāji ūmac̄ūjū gāna. ¹¹Jane mejeju adi mac̄ar̄uc̄ōro ī rujeoroto riojua, “No yū Mac̄u Jesucristore t̄uor̄ūn̄urā yū n̄arā riti n̄arā yirāji īna”, yi t̄uoīasotiyijū Dios. Ī t̄uoīasotiro bajiroti r̄eta adi r̄um̄uri īja. No mani Ūju Cristore t̄uor̄ūn̄uḡūti Dios yagu n̄aguīji. ¹²Jesucristore t̄uor̄ūn̄uc̄ōri, “Yūre masogū yiguīji Dios”, yi t̄uoīa mani īja. Ito bajiri īre masic̄ōri ḡūimenati Diore busia mani. ¹³Mua judio masa meje n̄arāre Cristo oca yū riasoja tic̄ōri, tubiara wijū yū n̄eñaro t̄ōb̄jaroca yama īna. Itire masic̄ōri,

“Bujato baja”, yi tuoia bojori bujabesa mua. “Pablo gotija tuocõri, Jesucristore tuorũnũsocu mua. Ito bajiri Dios ñarã ña gua ija”, yi wanũruja muare.

Cristo manire i maire gaye

14 Rẽtoro queno tuoĩagũ ñari judio masa mejere cuni masogũ yigũiji Dios. Ito bajiri itire tuoĩacõri, rijomunigãna ñini rũjũa yu, Mani Jacu Diore rũcũbuorocu. 15 Jeyaro Dios ñarã, ũmacũju cuni, adi sitaju cuni i rujeoana riti ña mani. Ito bajiri iti ñami mani Jacu ñasagu. 16 Rẽtoro masigũ ñari, manire queno ejabua masiguĩji Dios. Ito bajiri muare yiari ado bajiro Diore senia yu, “Mu ya usi ñinare queo sãcõri queno ña tuoia oca seoroca yiya”, yi senia yu Diore muare yiari. 17 “Jesucristore tuorũnrã ña ñajare ire riti ña cũdiroca yiya”, ya yu Diore muare yiari. Manire i maiado bajiroti gãjerãre mua maire amoa yu. 18 No mani ñaroti manire tuo maigũ yigũiji Cristo. ũmacũju, jacaju cuni no mani ñaroti manire maigũ yigũiji i. Wesicaju, rocaju cuni no mani ñaroti manire maigũ yigũiji Cristo. “Manire maisaguĩji Cristo”, yi tuoĩarã rãca sigũre bajiro mua tuoiare amoa yu. Ito bajiro mua tuoĩatoni muare yiari Diore senia yu. 19 Manire maisacõami Cristo. “Adocõ manire maiguĩji”, yi mani tuoĩaro rẽto busaro manire maiguĩji Cristo. “Riti baja iti”, mua yitoni, Diore senia yu. Ito bajiri Diore tuorũnu rẽtocũcõri i amoro bajiro riti mua yire amoa yu.

20 Mani ya usiju Dios i ñajare, i masirisena manire queno ejabua masiguĩji Dios. Ire mani seniro rẽto busaro ejabuaguĩji Dios manire. Ito yicõri mani tuoĩaro rẽto busaro ejabua masiguĩji i manire. Itire tuocõri, “Rẽtoro queno yigu ña Dios mu”, yi ire rũcũbuotĩñaruja manire. 21 Jesucristona suoriti manire masoñi Dios, i ñarã mani ñatoni. Ito bajiri ire rũcũbuotĩñaruja manire. “Rẽtoro masigũ ña Dios mu”, yi rũcũbuotĩñaruja mani ire. Ito bajiro riti bajitĩñajaro.

Sigũre bajiro mani tuoĩaroca yigu ñami Espĩritu Santo, yire gaye

4 1 Mani Eju Jesucristo oca masare yu riasoja ticõri, adoju tubiara wi yure tubiacã ña. Muare yu riasogore tuoĩacõri ado bajiro muare riasoa yu mucana. “Quenarise riti mani yi ñatoni manire beseñi Dios”, yi tuoĩarã ña mua. Ito bajiri, “I amoro bajiro riti cũdisotiya mua”, yi josa yu muare. 2 “Gãjerã rẽtoro ñasagu ña yu”, yi tuoĩabesa mua. Quenoti gãjerãre mua rotija quena. Ito yicõri gãjerãre usirioro yi codebesa. Gãjerã ña muare ñeñaro yija, ñare ti tudibesa. Ñare ti maicõri, ñare ejabuaya mua. 3 Gãmeri ejabuacõri oca mano ñaña mua. Sigũ bajiro riti mani tuoĩaroca yigu ñami Espĩritu Santo. Ito bajiri wanũre rãca ire cũdisotiya mua. Ito bajiro mua yija ticõri, sigũre bajiroti mua tuoĩaroca yigu yigũiji i. 4 Sigũ ñabojaguti mani jeyarore quedi sãjañi Espĩritu Santo. Ito bajiri Jesucristore tuorũncõri sigũ bajiro riti tuoĩarã ña mani ija. Ito yicõri co masa bajiro ña mani ija. Dios i beseana ñari, “Dios rãca catitĩñagũ yiguja yu”, yi tuoia mani. 5 Sigũti ñami Jesucristo mani Eju. Ito bajiri i sigũreti

tuorũna mani. “Cristore tuorũnugũ ñaguĩji ĩ cuni”, yi gãjerã ĩna ti masitoni idé gu rotia mani. ⁶Mani Jacu Dios sigũreti rucubwoa mani. ĩ sigũti ñami mani jeyarore roti masigũ. Mani ya usiju ñacõri, manire ejabuaguĩji Dios. Ito bajiri ĩre mani moa ĩsi masitoni mani jeyarore ejabuagu yiguĩji ĩ.

⁷ĩre mani moa ĩsisosatoni mani masiroca yigu ñami Cristo. Manire ti maicõri, ĩ amoro bajiro mani moa ĩsisosaroca yami Cristo. ⁸Ito bajiri ado bajiro gotia Dios oca tuti:

Umacũju ĩ tũdi waroto riojua ĩ wajanare rētocũgũ yiguĩji Cristo. Ito bajiro yicõri jaje quenarise ĩ ñarãre ĩsigũ yiguĩji Cristo, yi gotia Dios oca tuti.

⁹Tite mua: “Umacũju tũdi wacu yiguĩji ĩ”, yi gotia Dios oca. “Umacũju ĩ tũdi waroto riojua, cajero jacaju adi sitaju ruji ejañi ĩ”, yi tuoĩa mani. ¹⁰Adi sita rocajuga tuti ejarũ ĩti ñami mũcana umacũjuga weca tuti mũa waru. “Coju ruyabeto roticũja yũ”, yirocu ĩto bajiro yiyiju Jesucristo ĩ masirisena. Ito bajiri jeyaro roti masiguĩji Cristo. ¹¹ĩti ñami queno mani moa masiroca yigu. Tite mua. Mani coriarãre ĩ oca mani goti ucutoni cũni. Gãjerã Diore goti ĩsiri masa mani ñatoni cũni Cristo. Gãjerã ĩre ĩna tuorũnutoni, ejabua masiama ĩna. Gãjerã queno Jesucristore masirãre umatã ña masiama ĩna. Ito yicõri gãjerã queno masare ĩna riaso masiroca yiñi Cristo. ¹²Ito bajiro mani masiroca yiñi Cristo, Diore yiarĩ queno mani moa ĩsitoni. Ito yicõri mani oca seotoni, cocati mani gãmeri ejabua masiroca yiñi Cristo. Ito bajiro ĩ yijare ĩ ñarã ñari, sigũ bajiro riti tuoĩarã ña mani ĩja. ¹³Ito bajiri sigũre bajiro tuoĩacõri coro bajiroti Cristore tuorũnrã yirãji mani. Ito bajiro yicõri, Dios Macure queno masirã yirãji mani. Mani ya usiju ĩ ñajare, ĩre bajiroti tuoĩarã yirãji mani cuni. Yoari ĩre masicõri, queno cudirã yirãji mani. ¹⁴Rĩaca bajiro mani tuoĩare amobiquĩji Cristo. Biyaro mani tuoĩarise wasoare amobiquĩji Cristo. ĩ sigũreti mani tuorũnũre amoguĩji ĩ. Ito bajiri gãjerã ricati tuoĩarã, queno oca ĩna gotibojarocati, ĩnare tuorũnumenaji mani. ¹⁵Ado bajirojua yirãji mani. Gãjerãre ti maicõri, riojo oca gotirã yirãji mani. Ito yicõri, buto busa Cristore tuorũnucõri, ĩ amoro bajiro riti cudirã yirãji mani. ĩti ñami mani ũju. Ito yicõri, ĩ ñarã ña mani. ¹⁶Jãjarã mani ñabojarocati sigũre bajiro tuoĩacõri ĩre mani moa ĩsiroca yami Cristo. Manire umatã ñagũ ñari, mani rijoga ñami Cristo. Ito yicõri ĩre moa ĩsirã ñari ĩ ya ruju robo bajirã ña mani. Riojo ĩre mani cudija, cocati queno moarã yirãji mani. Gãmeri ti maicõri, gãmeri queno ejabuarã yirãji mani. Ito yicõri buto busa Cristore tuorũnrã yirãji mani.

Cristona suoriti mame tuoĩare ña manire, yire gaye

¹⁷Mani ũju Cristo ĩ yũre rotijare, ado bajiro busia yũ mũare: Diore masimena ĩna yiyo bajiro mũcana tũdi ñeñaro yibesa mua. ĩna tuoĩaro bajiroti yibojama ĩna. ĩnare bajiro yibesa mũama. ¹⁸Dios ocare tuo amobiticõri, “Ado bajiro yũ yi ñare amoguĩji Dios”, yi masimenaji ĩna. Ito bajiri Dios ñarã meje ñari ĩ rãca sigũ bajiro tuoĩamenaji ĩna. Ito bajiro bajirã ñari Dios ocare tuo masimena

yirāji ĩna ĩja. Ĩ ocare tuo masibiticōri, rāitīaroju ñarā bajiro bajirāji ĩna. ¹⁹“Iti ña ñeñarise”, yi masibojarāti ñeñaro yi uycōrāji ĩna. Ito yicōri ñeñaro ĩna yija bero ñabojarocati, “No yibea”, yirāji ĩna. ĩna āmoro bajiroti romia rāca, ũmua rāca cūni jeyaro ñeñaro ĩna yirise yirāji ĩna. ĩna tuoīaro bajiroti buto ñeñarise yi uyarā yirāji ĩna. ²⁰Jesucristo ocare masibojarāti, “Ĩre masimena bajiro ñeñaro gua yire, āmobiqūji Cristo”, ¿yi masibeati mua? ²¹Jesucristo oca quenarise ĩ riasore gaye tuogoana ña mua. Ĩ ocare tuorūnrā mua ñaja, “Ĩ oca ñasarise ña”, yi tuoīarā yirāji mua. ²²Iti rumu Jesucristore mua masiroto riojua, ñeñarise yi ñayija mua. Ñeñaro tuoīacōri, buto busa ñeñaro yi ñayija mua maji. Ito bajiri ñeñaro tuoīarisere mucana itire tūdi tuoīabesa mua. Itire jidicāña mua ĩja. ²³Ñeñaro tuoīarise jidicācōri, Dios ĩ tuoīaro bajirojua mame tuoīare wasoaya mua. ²⁴Mame tuoīare wasoacōri, Dios ĩ āmoro bajiro yiya mua. Ĩre bajiro quenarise riti mani yitoni mame tuoīare gaye manire wasoacōañi Dios. Ito bajiro ĩ yijare ñeñarise tuoīamenati quenarise riti mani yija quena.

²⁵Ito bajiri mua socare oca cūni jidicāña. Ñasarise riti gāmeri oca gotiya mua. Cristo ñarā ñari, co masa robo bajirā ña mani ĩja.

²⁶Gājire junisinibojarāti, ĩre ñeñaro yibesa mua. Ito yicōri ũmacañi ĩ quedī sājaroto riojua oca quenocōri, mua junisinirise jidicāma. ²⁷Mua junisinirise mua jidicābeja, rūmúa ujure cudirā yirāji mua. Ito bajiri itire yibesa mua.

²⁸Rinigoana mua ñaja, tūdi mucana rinibesa. Ado bajirojua mua yija quena. Waja bujarona queno moaña. Waja bujacōri, bojoro bujarāre ejabuaya.

²⁹Oca ñeñarise busibesa mua. Ado bajirojua mua yija quena. Gājerāre ejabuarona oca quenarise riti busiya. Ito bajiro mua busija tuocōri, tuoīa oca sēorā yirāji ĩna. Ito yicōri buto busa Diore tuorūnu āmorā yirāji ĩna.

³⁰Ñeñaro mani yija ticōri, bojori bujagu yiguūji Espíritu Santo. Ito bajiri itire yibitirūja manire. Ĩ ñami mani ya usiju quedī sājaru. Manire ĩ quedī sājaja bero, “Dios yagu ña yu. Ito bajiri masa ĩna ñeñaro yirise waja Dios ĩ waja seniri rumu yure masogū yiguūji ĩ”, yi tuoīa mani.

³¹Gājire ñeñaro mua tuoīaja, jidicāña itire. Gājire mua ti tudija, jidicāña. Gājerāre mua junisinirise jidicāña. Gājerāre ñeñaro busitubesa. Gājire oca menibesa. Gāmeri tudirisere jidicāña mua. Ito yicōri gājerāre ti tudibesa mua. ³²Ado bajirojua mani yija quena. Gājerāre ti maicōri, ĩnare queno yirūja manire. Manire ñeñaro ĩna yibojarocati, ĩnare mani ācabojoja quena. Dios cūni mani ñeñaro yirisere ācabojoñi ĩ, Jesucristore tuorūnrā mani ñajare. Ito bajiri gājerā ñeñaro manire ĩna yibojarocati itire mani ācabojoja quena.

Dios rīa mani ñaja ado bajiro ñarūja, yire gaye

5 ¹Dios rīa, ĩ mairā ñari, queno ĩ yiado bajiroti queno yiīana mani cūni. ²Manire Cristo ĩ mairo bajiro gājerāre cūni mairūja manire. Manire ti maicōri, mani ñeñaro yirise waja, waja yi ĩsirocū goda ĩsiñi Cristo. Manire Cristo ĩ queno yigore ticōri, buto wanuyiju Dios.

³Dios ñarã ña mani ija. Ito bajiri mani ñmua romiare ajebitiruja manire. Ñmua ajebesa romia mua cuni. Ñeñarise ñarocōti yibitiruja manire. Ito yicōri gāji ya gajeonire ti wobitiruja manire. Ñeñaro yibitiruja manire, “Ñeñaro yirã ñama ña”, gājerã ña yibe yirona. ⁴Oca ñeñarise busibitiruja manire. Tuoïamenati busibitiruja manire. Ito yicōri romia rãca ajere gaye busibitiruja manire. Quenarise meje ña iti. Ado bajirojua busiruja manire. “Manire queno yami Dios”, yi gāmeri busi wanuruja manire. ⁵Tuoya mua. Riti mware gotia ya. Ñeñaro yirã Cristo ñarã meje ñama ña. Ito bajiri Dios i rotiroju ejamenaji ña. No rocati romiare ajegũ, Dios tujũ ejabiquiji i. Coriarã Diore mairo rêto busaro gajeonire mairãji ña. Dios i tija ire rucubworã meje ñarãji ña. Ito bajiri ñaõna Dios i rotiroju ejamenaji. ⁶“Ñeñarise meje ña iti”, yi ruorãre tuobesa mua. Ñeñaro yirãre ti tudiguji Dios. Ña cudibitire waja tóbujarã yirãji ña. ⁷Ito bajiri ñare bajiro yibe yirona, ña rãca baba cutibesa mua.

⁸Iti rumũ ñeñaro yisoticōri, rãitiaroju ñarã robo bajiro ñayija mani maji. Adi rumuriama Jesucristore masicōri, busuroju ñarã robo bajiro ña mani ija. “Iti ña ñeñarise. Iti ña quenarise”, mani yi masiroca yami mani Uju Jesucristo. Ito bajiri i ñarã ñari queno yi ñaruja manire. ⁹Mani ya usiju Espiritu Santo i ñajare, busuroju ñarã bajiro ña mani ija. Ito bajiri quenarise riti yiruja manire. Ñeñarise yimenati, Dios i ãmoro bajiro riti yiruja manire. Mani busija ñasarise gotiruja manire. ¹⁰“Ado bajiro ya yija, wanugũ yiguji Dios”, yi masirona, quenarise riti yiaruja manire. ¹¹Diore masimena, rãitiaroju ñarã bajiro ñarãji ña. Ña ñeñaro yirisere ti wanubiquiji Dios. I tũ waja bujamenaji ña. Ito bajiri ña rãca ñeñaro yibesa mua. Ado bajirojua mua yija quena. Ñeñaro yirãre Dios oca ñare goti masioña, “¿Ñeñaro yirã ñayijari gua?” ña yi tuo masitoni. ¹²Masa gājerã ña tibeto buto ñeñarise yirã ñarãji ña. Ña ñeñaro yigore mani busija, buto bojorise ña. Ito bajiri itire busibitiruja manire. ¹³Ado robojua mani yija quena. Dios oca ñare mani goti masioja, busuro queno ruyuroju ñarã bajiro ñacōri, ña ñeñaro yirisere ti masirã yirãji ña. “¿Ñeñaro yirã ñayijari gua?” yi tuo masirã yirãji ña ija. Ito bajiro tuoïacōri, coriarã Jesucristore boca ãmirã yirãji gajea. ¹⁴Ito bajiri ado bajiro gotia Dios oca:

Caniana, godacãna bajiro bajirã ña mua. Ñeñaro yibojarãti, “Ñeñaro yirã ña gua”, yibea mua. Ito bajiri yujiya, Cristore tuorũnuña mua.

Busuroju ñarã bajiro mua ñaroca yigu yiguji Cristo, yi gotia Dios oca.

¹⁵Diore masirã ñari, queno tuoñaña, Dios i ãmoro bajiro mua yi ña masitoni. Diore masimena bajiro yi ñabesa mua. Diore masirã ñari i ãmoro bajiro riti yi ñaña mua. ¹⁶Adi rumuri buto ñeñarise yama masa. Ito bajiro ña yibojarocati quenarise yi ñaña muama. “Tãdi ejagu yiguji Cristo”, yi tuoïacōri, Diore moa ñsiña mua. ¹⁷Rocati queno tuoïamena bajiro bajibesa mua. Dios ocare queno tuo masiña, i ãmoro bajiro mua yi masitoni. ¹⁸“Idire queacōri, wanugũ yiguja ya”, yi tuoïabesa mua. Ito bajiro mua queaja, ñeñaro yirã yirãji mua. Ado bajirojua yiya. Espiritu Santo mua ya usiju i ñajare, i robo tuoïacōri i

ãmoro bajiroti yiya. ¹⁹ Espíritu Santo rãca sîgũ bajiro riti tuoĩacõri, mani Ʋju Jesucristo ocare gãmeri busi wanuña mua. Ito bajiro busi wanucõri, ï ocare basa sãaña. Ito yicõri ïre wanurã, mua ya usina ïre basa rucubwoya mua.

²⁰ Cristo ñarã mani ñajare, “Queno ya Dios mu”, yiruja manire mani Jacure. “Queno ya Dios mu. Dise ruyabeto mu yisotirise quenarise riti ña”, mani yija, mani Ʋju Jesucristo wamenati yisotiruja manire.

Cristore tuorũnurã ñari ado bajiro mani ñaja quena, yire gaye

²¹ Cristore rucubworã ñari, gãjerã ïre masirãre cuni rucubwoja quena. Ito yicõri rucubwoire rãca gãmeri cudiya mua.

²² Tuoya romia mua, muare busigu ya yu. Mani Ʋju Cristore mani cudiyo bajiroti mua manujusabatiare queno cudiya quena. ²³ Mua manujũ cutija bero, ïti ñami mua Ʋju. Ito bajiroti Cristo ñarã mani ñaja, ïti ñami mani Ʋju. Manire ũmatã ñagũ ñari mani rijoga bajiro bajigu ñami Cristo. Ito yicõri ïre moa isirã ñari ï ya ruju robo bajirã ña mani. Manire masorocu manire goda isĩni ï. ²⁴ Ito bajiri mani Cristo ñarã, ïre mani cudiyo bajiroti mua manujusabatiare cuni cudisotiya mua.

²⁵ Tuoya ũmua mua, muare busigu ya yu. Mua manojosãromiare buto maiña mua. Manire cuni buto maiguĩji Cristo. Ito bajiri ï ñarã mani ñatoni, manire yiarĩ goda isĩni ï. Manire ï mairo bajiroti mua manojosãromiare maiña mua cuni. ²⁶ Manire goda isĩni Cristo mani ñeñaro yirise coerocu. Ito yicõri manire beseñi ï ñarã riti mani ñatoni. Dios ocare mani tuorũnuja ticõri, mani ñeñaro yirise coeñi Cristo. Mani ñeñaro yirise jidicãcõri, idé gu roticu mani. Ito bajiro ïre mani tuorũnuja ticõri, mani ñeñaro yirise coeñi Cristo. ²⁷ Ito bajiro manire coeñi Cristo, ï riojo seti mana mani ejatoni. Ito bajiro manire ï yicãre ñajare, ï riojo ñeñaro yimena bajiroti ejarã yirãji mani. Ito yicõri seti mana bajiro ejarã yirãji mani, ï riojo. “Queno yirã ña mua”, yi manire boca ãmigũ yiguĩji ï. ²⁸ Mua manoyo cutirã ito bajiroti mua manojosãromiare queno tuoĩaja quena. Mua ya rujuuri mua mairo bajiroti mua manojosãromiare cuni maiña. Mua manoyo cutija bero, jũarã ñabobarãti co ruju bajiroti ruju cutirã ña mua. Ito bajiri mua manojosãromiare mua maija, mua ya rujuuri mairo bajiroti maia mua. ²⁹⁻³⁰ Mani ya rujure ti tebea mani. Mani ya rujure maicõri, itire queno tirũnurã yirãji mani. Ito bajiroti Cristo cuni queno tirũnugũ yiguĩji ï ñarãre. ï ñarã ñari, ï ya ruju robo bajirã ña mani. Ito bajiri manire queno tirũnugũ yiguĩji Cristo. ³¹ Ado bajiro gotia Dios oca: “Sîgũ manoyo cuticõri jũarã ñabobarãti, co ruju bajiroti ruju cutirã ñarãji ña. ï manoyo cutija, ï jacu ï jaco rãca cuni ñabiquĩji ïja. Ito yicõri jũarã ñabobarãti co ruju bajiroti ruju cutirã yirãji ña”, yi gotia Dios oca. ³² Iti ocare mani tuo masi ãmoja, josari ña. Ito bajibojarocati iti oca queno manire goti masioa. “Cristo ñarã ï ya ruju robo bajirã ñama”, yi riasoa iti oca. ³³ Manoyo cutire gaye cuni queno riasoa iti oca. Ito bajiri mucana muare gotia yu. Mua manojosãromiare queno maiña. Mua ya rujure mua mairo bajiroti queno mua manojosãromiare maiña. Romia mua cuni, queno rucubwoicõri, mua manujusabatiare cudiya.

6 ¹Rĩaca tɔoya mua cuni, muare busigu ya yu. Mua jacusabatiare yiro robo cudiya. Mani Ʋju Jesucristo ñarã ñari, mua jacusabatiare queno cudiruja muare. Ito bajiro mua yija Cristo ãmoro bajiro queno yirã yirãji mua. ²⁻³“Yure mua cudija ado bajiro yicuja yu”, yi tɔoĩa wacu ado bajiro rotisoyiju Dios. “Mua jacu, mua jacore cuni rucubɔoya”, yi gotiyiju Dios. Ito bajiro ï rotija bero, gaje ado bajiro goticãyiju Dios: “Mua jacusabatiare mua queno rucubɔoja, adi sita ñarã yoari wanɔ quena cati ñarã yirãji mua”, yi goticãyiju Dios.

⁴Rĩa cutirã tɔoya mua, muare busigu ya yu. Biyaro mua rĩa junisiniroca yibesa. Ado bajirojua mua yija quena. Mani Ʋju ï ãmoro bajiro ñnare ti maicõri, queno ñnare masoña. Ñeñaro ñna yija, ñnare gotiya ñna tɔo masitoni. Ito yicõri queno ñnare riasoya mua, Cristore queno ñna tɔorũnɔtoni.

⁵Gãjerãre moa ïsiri masa tɔoya mua, muare busigu ya yu. Wanɔre rãca mua ɔjarãre queno cudiya mua. Ito yicõri ñnare güi rucubɔoya. Cristore tɔorũnɔcõri, ïre queno cudia mua. Ito bajiroti mua ɔjarãre cuni queno cudija quena. ⁶“Yu ɔjarã yure ñna wanɔtoni ñna tiroca riti queno moagũ yiguja yu”, yi tɔoĩabesa mua. ñna tiroca, ñna tibeja cuni queno ñnare moa ïsija quena. Cristore mua moa ïsiro bajiroti queno mua ɔjarãre cuni moa ïsija quena. Mua ya usina Diore maicõri, ï ãmoro bajiro queno moa ïsiña mua ɔjarãre. ⁷Wanɔre rãca queno mua ɔjarãre moa ïsiña mua. “Ñnare yu queno cudija, Cristore cuni queno cudia yu”, yi tɔoĩacõri, mua ɔjarãre cuni queno moa ïsiña. ⁸“Mani yiro bajiroti, manire waja yigu yiguĩji Dios”, yi tɔoĩa mani. Moa ïsiri masa mani ñaja, moa ïsiri masa meje mani ñaja cuni, mani queno yiro bajiroti manire waja yigu yiguĩji Dios.

⁹Moari masa ɔjarã tɔoya mua, muare busigu ya yu. Muare moa ïsiri masare queno yiya mua. ñnare cuni queno muare cudi rotibu yu. Muare moa ïsiri masare usirioro yicõri, ñna güiroca yibesa. Sigũ ñami ùmacũju gagu mani Ʋju. Muare moa ïsiri masa Ʋju cuni ñaguĩji ï. “Mani yigore ti cõiacõri, ito bajiroti manire waja senigũ yiguĩji Dios”, yi tɔoĩa masiña mua.

Rũmũre mani r̃etocũtoni manire ejabuagu yiguĩji Cristo, yire gaye

¹⁰Yu ñarã susari muare ado bajiro gotisusa yu. Mani Ʋju rãca sigũ bajiro riti tɔoĩacõri, ï masirisena buto busa ïre tɔorũnũña mua. Ito bajiro yicõri buto oca s̃oõña mua. ¹¹Surarare tɔoĩate mua. ñna ya rujure camotarona ñna sãñarise gaye sãñarã yirãji ñna. Mua cuni ito bajiroti Dios ocare queno tɔorũnɔcõri, tɔoĩa oca s̃oõña, rũmũa ɔju muare ruobe yirona. Ito bajiro mua yija, muare ruo masibiquĩji rũmũa ɔju. ¹²Mani bajiro ruju cutirã rãca meje gãmeri tãrã ya mani. Rũmũa tiyamana rãca gãmeri tãrã ya mani. ñnati ñama adi macãrucũro rãitãroju ñeñaro yirã ɔjarã. ñna ñama ñeñaro mani yitoni manire usirioro yi coderã. ¹³Ija buto ñeñari rũmũri ejaro yiroja. Mani ñeñaro yitoni, ruje manire usirioyu yiguĩji rũmũa ɔju. Manire ï usirio codebojarocati, mani oca s̃otoni ado bajiro yiruja manire. Ñeñari rũmũ ito ejaroto riojua, Dios ocare queno riasotiruja manire iti

ejaroca oca sēorona. Ito bajiri oca sēcōri, Jesure jidicāmenaji mani. Ito bajiro mani yija, surara ĩna ya rujuri ĩna camotado bajiro bajirā yirāji mani ĩja.

¹⁴Jesucristore tuorūncōri, oca sēoña. Ito yicōri ñasarise riti busisotiba. Ito bajiro mua yija, sigū surara masu wecu wirowēñucōri, ĩ ñacādo bajiroti ñacārā yirāji mua cūni. Quenarise riti yisotiba. Ito bajiro mua yija, surara masu usi riojo camotaro bajiro bajirā yirāji mua. ¹⁵“Dios rāca mani oca cūtirise quenoñi Cristo. Iti ña oca quenarise”, yi masare gotirona masi yucāña. Ito bajiro mua yija, surara masu ĩ ya guboco sāñacōri, ĩ ñacāro bajiro ñarā yirāji mua. ¹⁶Queno Jesucristore tuorūnuña mua. Iti ña ñasarise. Ito bajiro mua yija, camotare gaye rucorā bajiro ñarā yirāji mua. Mani tuoia oca sēome yirocu, yirugū ũjricu manire jatucōagū bajiro yami rūmúa ũju. Ito bajiro manire ĩ yi codebojarocati Cristore mani tuorūnuja manire rētocū masibiquiji rūmú. ¹⁷“Jesucristore yu tuorūnuja ticōri, yure masoñi Dios”, yi tuoiacōri, oca sēoña mua. Ito bajiro mua oca sēoja, surara masu ĩ jesari coro jesarā bajiro ñarāji mua cūni. Dios oca Espiritu Santo mani masiroca ĩ yirisere queno tuo masiña mua. Ito bajiro mua tuoiaja, sigū sarera jāi rucogu bajiro ñarā yirāji mua. Ito bajiri rūmúa ũju muare ĩ usirioro yi codebojarocati Dios ocare masicācōri ĩjuare rētocūrā yirāji mua. ¹⁸Ito bajiro yirona Diore busisotiya mua. Coji ruyabeto Espiritu Santo ĩ ejabuarisena, Diore busisotiya mua. ĩ āmoro bajiro yirona queno oca sēoro ña yucāña. Ito yicōri ĩre busi jidicābesa. Ito bajiro yicōri ĩ ñarāre yiari, Diore senisotiya mua. ¹⁹Yure yiari cūni Diore senisotiya. Dios oca yu gotiroca, Diore busiya mua, ĩ oca queno yu goti masitoni. “Masa jeyarore maso āmoguĭji Dios”, yi masibisjarā masa maji. Güibicūti iti oca masare yu gotitoni yure yiari Diore busiya mua. ²⁰Iti oca yu gotitoni yure cūni Dios. Iti oca masare yu gotija ticōri, ado tubiara wiju yure tubiacā ĩna. Dios ĩ āmoro bajiro güibicūti iti oca yu gotitoni, yure yiari Diore seniña mua.



(Efesios 6.13-17)

Queno ñaña mña, Pablo ĩ yi ñucare gaye

²¹Tíquico, mani yagu, mña tñ wacu yami. ĩ ñami mani Ɔjũ gaye yũ moaroca queno ejabuagu. Mña tñ ejacõri, yũ gaye, yũre rētagore, mñare goti jeogu yiguĩji ĩ. Ito yicõri ado yũ moarise gaye mñare gotigu yiguĩji ĩ. ²²Ito bajiri ĩre cõa yũ, yũ gaye mñare ĩ gotitoni. “Queno ñaguĩji Pablo”, yi tũo masicõri mña ya Ɔsijũ tũoĩa oca sēorã yirãji mña. Ito bajiro mña oca sēotoni mña tũju ĩre cõa yũ.

²³Mani Jacũ Dios, ito yicõri mani Ɔjũ Jesucristore cũni queno tũorũnrã ña mña. Ito bajiri mña ya Ɔsijũ queno mña wanũ quenaroca yijaro ĩna. Ito yicõri mña gãmeri ti mairoca yijaro ĩna. ²⁴Mani Ɔjũ Jesucristore mai jidicãmenare queno yijaro Dios mñare. Itocõ ña.